



Sesida dals

Communitgà ils

Protocol nr.

6 da settember 2022

7 da settember 2022

702/2022

Incumbensa da la fracziun da la PPS

concernent in termin da carenza ed ina pensiun per anteriurs cussegliers guvernativs
(emprim sutsegnader Gort)

Resposta da la Regenza

Ina incumbensa sumeglianta da la fracziun da la PS dals 24 d'october 2018 è vegnida refusada cleramain dal Cussegl grond en la debatta dals 12 da favrer 2019. En sia resposta da quella giada ha la Regenza explitgà ch'i fiss – en cas d'in temp da carenza – facticamain nunpussaivel per las commembras ed ils commembers da la Regenza partents da surpigliar ina nova activitad adequata. L'intervenziun respectiva en il dretg fundamental da la libertad economica fiss considerabla. En spezial vegniss restrenschì il dretg costituziunal da la libra tscherna da la professiun e da l'access liber ad in'activitad da gudogn en l'economia privata. I tutgia tar la tradiziun (er tar la Confederaziun ed en ils auters chantuns) che las commembras ed ils commembers da la Regenza s'engaschan suenter lur demissiun a favur da la societad e da l'economia, particularmain, sch'ellas ed els èn giuven, cura ch'ellas ed els sortan da lur uffizi. Betg sco ultim saja quai er in'expressiun da noss sistem da milissa, tenor il qual uffizis cumplains, sco quel d'ina cussegliera guvernativa u d'in cusseglier guvernativ, pon vegnir exequids giustifitadamain mo durant in temp limità. Sin basa da lur experientscha e da lur relaziuns adempleschan las anteriuras commembras ed ils anteriurs commembers da la Regenza las premissas necessarias per l'economia privata, dentant er per la collavuraziun en organisaziuns d'utilitad publica. Perquai che las commembras ed ils commembers da la Regenza èn obligads a la discreziun en fatschentas uffizialas, pon vegnir impedids conflicts d'interess. Areguard questa argumentaziun n'è er sa midà nagut ord vista dad oz.

Ina retschertga da la Chanzlia chantunala da l'avust 2022 mussa plinavant che nagins chantuns n'enconuschan in temp da carenza per anteriuras commembras ed anteriurs commembers da la Regenza – er betg quels chantuns che n'han nagina limitaziun dal temp d'uffizi. Er sin plaun federal èn pretensiuns politicas sumegliantas vegnidas refusadas gia pliras giadas.

Independentamain da quai èsi ina incumbensa permanenta da mintga instituziun d'appplitgar ina public corporate governance moderna. Ella sa sviluppa vinavant permanentamain, e quai sin tut ils plauns statals (Confederaziun, chantuns, vischnancas). La Regenza è da l'avis che mandats duessan vegnir surpigliads da las persunas ch'èn adattadas il meglier e che han las abilitads necessarias, las enconuschientschas relevantas specificas e da la branscha sco er l'experientscha professiunala e da direcziun necessaria. Da quest circol da persunas fan potenzialmain part er las anteriuras commembras ed ils anteriurs commembers da la Regenza. Quai vala en spezial per interpresas sco er per organisaziuns d'utilitad publica cun sedia en il chantun, sch'il chantun è participà a talas u è collià en autra moda cun talas. In temp da carenza cuntrafaschess a questa finamira; el sa lascha cuntanscher mo tras l'applicaziun consequenta da reglas transparentas en ina procedura ordinaria. Ils criteris per la selecziun e per las obligaziuns da las represchentanzas èn fixads gia oz en l'Ordinaziun davart la realisaziun da la public corporate governance per il chantun Grischun (OR-PCG; DG 710.400). Per recrutar mandatarias e mandataris existan ultra da quai differents mussavias e profils d'exigenzas (en spezial il criteri ch'i na dastgan esser avant maun nagins conflicts d'interess e naginas dependenzas en regard finanziel, persunal e material).

La Regenza surpiglia l'intenziun da l'incumbensa concernent l'ulteriur svilup da la public corporate governance. Per rinforzar l'acceptanza e la confidenza en il process ed en las instituziuns duain ils instruments vegnir extendids vinavant. Uschia duain las proceduras da recrutaziun e d'elecziun per mandatarias e mandataris vegnir concepidas en moda pli averta e transparenta tras ina communicaziun publica. Plinavant na duain anteriuras commembras ed anteriurs commembers da la Regenza betg pli vegnir nominads gia durant il temp d'uffizi.

Sa basond sin questas explicaziuns propona la Regenza al Cussegl grond da midar l'incumbensa qua avant maun sco suonda:

La Regenza vegn incumbensada d'adattar la public corporate governance uschia, che las proceduras da recrutaziun e d'elecziun per mandatarias e mandataris vegnan communitgadas publicamain e che anteriuras commembras ed anteriurs commembers da la Regenza na vegnan betg pli nominads gia durant il temp d'uffizi.



En num da la Regenza

Il president:

Marcus Caduff

Il chancelier:

Daniel Spadin